

— 406 —

bedenthalb gemeinlich über ein komen, daz wir einander gebunden sülent sin ze helfende, ze schirmende alles daz wir inne hant, vnd des wir sizent in nuzelicher gewer, also daz nieman des guotes so er inne hat ane recht entwert werde. Es ist och ze wissende, were, daz ieman die egenante vnser herschaft von Östereich gewonlich phante vmb soliche schulde, dar vmb er derselben herschaft offene besigelte briefe hette, an den ime phandunge erlobt were, wider die, sin wir die vorgenanten drie stette nüt gebunden ze helfende, wir tuon es denne gerne. Were aber, daz die vorgenante herschaft, oder ir amptlute, vor den reten vnser drier stetten deheiner, wa si denne wellent, kuntlich machtent, als den rat denne bescheidenlich vnd recht dunchte, daz die schuldbrieff erlöset weren, oder daz si die herschaft deheins weges nüt binden solten, wider die sullen wir inen beholfen sin, als gegen andern. Were och zwo gelicher wise, daz ieman vns die vorgenanten stette, oder vnser burgere gewonliche phante, vmb solich schuld dar vmb er der stette deheiner briefe hette, dar an ime phandunge erlobt were, dar vmb ist vns och vnser vorgenant herschaft, noch ir amptlute, nüt gebunden ze helfende, si tuon es denne gerne. Möhten aber wir kuntlich gemacht vor den vorgenanten vögten ein, vnd den vieren, die er zwo ime setzen sol, also die funfe denne bescheidenlich vnd rechte dunchte, daz die schuldbrieff erlöset werin, vnd vns deheins weges nüt binden solten, wider die sullen si vns och beholfen sin, als gegen andern. Wenne och ein alter rat abe gat vnder vns den vorgenanten drien stetten, der sol dem nūwen rate in den eit geben, dise verbuntnisse stete ze hande vnd ze vollfürende als vorgeschriben stat, ane alle geuerde. Wir sint och über ein komen, daz wir deste fruntlicher in dirre verbuntnisse geleben mögent, daz nieman, der in dirre verbuntnisse ist, vnd noch dar in kunt, den andern höften, noch bekümben sol, denne ie den man vor sine richter, es were denne richter gelte oder burge. In dirre verbuntnisse sülent sin, vnser herren Herzog Albrecht von Östereich, vnser frowwe sin Herzogin vnd ire kint, vnd